



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

29.10.2019թ.

## Ո Ր Ո Շ ՈՒ Մ

### ՀՀ գնումների հետ կապված բողոքներ քննող անձի թիվ ԱՑ-ՆԳ-2019/169

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի, ուսումնասիրելով Հայաստանի Հանրապետության ֆինանսների նախարարության 14.10.2019թ. թիվ 26/26-1/16849-2019 գրությամբ «Յդկադ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

#### **1. ՀՀ ֆինանսների նախարարության ներկայացրած փաստերը և պահանջը.**

ՀՀ ֆինանսների նախարարությունը, Հայաստանի տարածքային զարգացման հիմնադրամի 14.10.2019թ. թիվ Ե/01/274-19 գրության հիման վրա, 14.10.2019թ. թիվ 26/26-1/16849-2019 գրությամբ նախաձեռնել է «Յդկադ» ՍՊԸ-ին (հետայսու նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

## **2. «Յդկադ» ՍՊԸ-ի ներկայացրած փաստարկները և դիրքորոշումը.**

Գնումների հետ կապված բողոքներ քննող անձի սույն որոշումը կայացվելու օրվա դրությամբ «Յդկադ» ՍՊԸ-ի կողմից որևէ դիրքորոշում չի ներկայացվել:

«Յդկադ» ՍՊԸ-ն, պատշաճ ծանուցված լինելով ՍՑ-ՆԳ-2019/169 ընթացակարգի շրջանակներում 17.10.2019թ. ժամը 10:40-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

## **3. Հայաստանի տարածքային զարգացման հիմնադրամի կողմից ներկայացված փաստարկները և դիրքորոշումը.**

Հայաստանի տարածքային զարգացման հիմնադրամը (հետայսու նաև՝ Պատվիրատու) ՀՀ ֆինանսների նախարարությանն ուղղված 14.10.2019թ. թիվ Ե/01/274-19 գրությամբ հայտնել է, որ Հայաստանի տարածքային զարգացման հիմնադրամի կարիքների համար «Գյումրու հոգեկան առողջության կենտրոն» ՓԲԸ-ի շենքի ներքին հարդարում» աշխատանքների ձեռքբերման նպատակով կազմակերպվել է «ՀԾ-ԳՀ-ԱՇՁԲ-2019/28» ծածկագրով գնանշման հարցման ընթացակարգ, որի արդյունքում ս.թ. մարտի 19-ին կնքվել է «ՀԾ-ԳՀ-ԱՇՁԲ-2019/28» ծածկագրով պայմանագիր «Յդկադ» ՍՊԸ-ի հետ: Պայմանագրով աշխատանքների կատարման վերջնաժամկետ է սահմանվել ս.թ. օգոստոսի 03-ը: Սակայն, հաշվի առնելով այն հանգամանքը, որ՝

- պայմանագրային պարտավորությունների կատարման համար սահմանվել է լրացուցիչ երկամսյա ժամկետ, որի ընթացքում իրականացվող աշխատանքների ընթացքը մնացել է անբավարար,

- մինչև օրս իրականացվել է նախատեսված շինարարական աշխատանքների ընդամենը՝ 7967013 ՀՀ դրամի չափով, և հիմք ընդունելով «ՀԾ-ԳՀ-ԱՇՁԲ-2019/28» պայմանագրի 3.1 կետի 3.1.4 (բ) ենթակետի և 6.3 կետի դրույթները՝ լուծվել է 19.03.2019թ. կնքված պետության կարիքների համար կապալային աշխատանքների կատարման պետական գնման թիվ «ՀԾ-ԳՀ-ԱՇՁԲ-2019/28» պայմանագիրը:

Պատվիրատուն, պատշաճ ծանուցված լինելով ՍՑ-ՆԳ-2019/169 ընթացակարգի շրջանակներում 17.10.2019թ. ժամը 10:40-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

**4. ՍՑ-ՆԳ-2019/169 ընթացակարգի քննության համար էական նշանակություն ունեցող փաստերը.**

ՍՑ-ՆԳ-2019/169 ընթացակարգի քննության համար էական նշանակություն ունեն հետևյալ փաստերը.

1. Հայաստանի տարածքային զարգացման հիմնադրամի և «Յդկադ» ՍՊԸ-ի միջև 19.03.2019թ. կնքվել է «ՀԾ-ԳՀ-ԱՇՁԲ-2019/28» ծածկագրով պայմանագիր (հետայու նաև՝ Պայմանագիր), որի համաձայն՝ Ընկերությունը պարտավորվել է Պայմանագրով սահմանված կարգով, նախատեսված ծավալներով, ձևով և ժամկետներում կատարել սույն պայմանագրի N 1 Հավելվածով սահմանված ծավալաթերթ-նախահաշվով նախատեսված «ՀՀ Շիրակի մարզի Գյումրու հոգեկան առողջության կենտրոն» ՓԲԸ-ի շենքի ներքին հարդարում» աշխատանքները (այսուհետ՝ աշխատանք), իսկ Պատվիրատուն պարտավորվել է ընդունել կատարված աշխատանքը և վարձատրել դրա համար:

2. Պատվիրատուին կողմից 10.10.2019թ. [www.gnumner.am](http://www.gnumner.am) տեղեկագրում հրապարակվել է «ՀԾ-ԳՀ-ԱՇՁԲ-2019/28» ծածկագրով պայմանագիրը միակողմանի լուծելու մասին ծանուցումը:

**5. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ՝ Գրիգոր Ներսիսյանս, ուսումնասիրելով ՀՀ ֆինանսների նախարարության 14.10.2019թ. թիվ 26/26-1/16849-2019 գրությունը, Հայաստանի տարածքային զարգացման հիմնադրամի 14.10.2019թ. թիվ Ե/01/274-19 գրությունը և կից փաստաթղթերը, հայտնում եմ հետևյալը.

ՀՀ քաղաքացիական օրենսգրքի 345-րդ հոդվածի 1-ին մասի համաձայն՝ պարտավորության ուժով մի անձը (պարտապանը) պարտավոր է մեկ այլ անձի (պարտատիրոջ) օգտին կատարել որոշակի գործողություն. այն է՝ վճարել դրամ, հանձնել գույք, կատարել աշխատանք, մատուցել ծառայություն և այլն, կամ ձեռնպահ մնալ որոշակի գործողություն կատարելուց, իսկ պարտատերն իրավունք ունի պարտապանից պահանջել կատարելու իր պարտականությունը:

Նույն օրենսգրքի 408-րդ հոդվածի համաձայն՝ պարտավորության խախտում է համարվում այն չկատարելը կամ անպատշաճ (կետանցով, ապրանքների, աշխատանքների և ծառայությունների թերություններով կամ պարտավորության բովանդակությամբ որոշվող այլ պայմանների խախտմամբ) կատարելը:

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ

մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Հայաստանի տարածքային զարգացման հիմնադրամի և «Յդկադ» ՍՊԸ-ի միջև 19.03.2019թ. կնքվել է «ՀԾ-ԳՀ-ԱՇՁԲ-2019/28» ծածկագրով պայմանագիր, որի համաձայն՝ Ընկերությունը պարտավորվել է Պայմանագրով սահմանված կարգով, նախատեսված ծավալներով, ձևով և ժամկետներում կատարել սույն պայմանագրի N 1 Հավելվածով սահմանված ծավալաթերթ-նախահաշվով նախատեսված «ՀՀ Շիրակի մարզի Գյումրու հոգեկան առողջության կենտրոն» ՓԲԸ-ի շենքի ներքին հարդարում» աշխատանքները, իսկ Պատվիրատուն պարտավորվել է ընդունել կատարված աշխատանքը և վարձատրել դրա համար:

Պայմանագրի գինը սահմանվել է 15 907 500 ՀՀ դրամ:

Պայմանագրի 1-ին կետի 1.3 ենթակետի համաձայն՝ աշխատանքները սկսվում են 05.04.2019 թվականից և կատարման ժամկետ է սահմանվում 120 օր:

Ընկերությանն ուղղված 01.08.2019թ. թիվ 2/86 գրությամբ Պատվիրատուն հայտնել է, որ Պայմանագրով նախատեսված աշխատանքները պետք է ավարտվեին մինչև 03.08.2019թ., սակայն առ 02.08.2019թ. չեն ավարտվել: Նույն գրությամբ Պատվիրատուն հայտնել է, որ Պայմանագրի 3.1.2 կետով սահմանված կարգով Ընկերությանը տրվում է ծրագրով նախատեսված աշխատանքների կատարման նոր ժամկետ՝ մինչև 02.09.2019թ. և միաժամանակ մինչև աշխատանքների ավարտման օրը կկիրառվի Պայմանագրի 6.2 կետով նախատեսված տույժը:

Նույն գրությամբ Պատվիրատուն տեղեկացրել է, որ ծրագրով նախատեսված աշխատանքները դանդաղ և ոչ պատշաճ իրականացնելու դեպքում Պայմանագիրը միակողմանի կլուծվի:

Ընկերությանն ուղղված համապատասխան գրությամբ Պատվիրատուն հայտնել է, որ պայմանագրային պարտավորությունների կատարման համար սահմանվել է լրացուցիչ երկամսյա ժամկետ, որի ընթացքում իրականացվող աշխատանքների ընթացքը մնացել է անբավարար, ուստի Պատվիրատուն, հիմք ընդունելով Պայմանագրի 3.1 կետի 3.1.4 (բ) ենթակետի և 6.3 կետի դրույթները, որոշվել է լուծել «Յդ կադ» ՍՊԸ-ի հետ 19.03.2019թ.

կնքված պետության կարիքների համար կապալային աշխատանքների կատարման պետական գնման թիվ «ՀԾ-ԳՀ-ԱՇՁԲ-2019/28» պայմանագիրը:

Պատվիրատուի կողմից 10.10.2019թ. [www.gnumner.am](http://www.gnumner.am) տեղեկագրում հրապարակվել է «ՀԾ-ԳՀ-ԱՇՁԲ-2019/28» ծածկագրով պայմանագիրը միակողմանի լուծելու մասին ծանուցումը:

Այսպիսով՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետը սահմանում է, որ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը:

Պայմանագրի 3.1.4-րդ կետի համաձայն՝ Պատվիրատուն իրավունք ունի միակողմանի լուծել պայմանագիրը և պահանջել հատուցելու իրեն պատճառված վնասները, եթե.

ա) Կապալառուն ժամանակին չի սկսում աշխատանքի կատարումը կամ աշխատանքը կատարում է այնքան դանդաղ, որ դրա ժամանակին ավարտը դառնում է ակնհայտ անհնար,

**բ) Կապալառուն խախտել է պայմանագրի 1.3 կետում նախատեսված ժամկետը (ներառյալ օրացուցային գրաֆիկը),**

գ) Կապալառուի կողմից կատարված աշխատանքը չի համապատասխանում նախագծանախահաշվային փաստաթղթերով սահմանված պահանջներին,

դ) Կապալառուի կողմից խախտվել են պայմանագրի 3.1.3 կետով նախատեսված հիմքերով աշխատանքի թերությունների անհատույց վերացման ողջամիտ ժամկետները:

Հայաստանի տարածքային զարգացման հիմնադրամի և «Յդկադ» ՍՊԸ-ի միջև 19.03.2019թ. կնքված «ՀԾ-ԳՀ-ԱՇՁԲ-2019/28» ծածկագրով պայմանագրի համաձայն՝ Ընկերությունը պարտավորվել է 05.04.2019թ. սկսած 120 օրյա ժամկետում իրականացնել 15 907 500 ՀՀ դրամ ընդհանուր արժողությամբ վերանորոգման աշխատանքներ, սակայն Ընկերության կողմից սահմանված ժամկետներում ամբողջությամբ չեն իրականացվել Պայմանագրով նախատեսված աշխատանքները և Պայմանագիրը լուծելու օրվա դրությամբ, համաձայն գործում առկա հանձնման-ընդունման թիվ 1 և թիվ 2

արձանագրությունների՝ իրականացվել են ընդամենը 6 378 023 ՀՀ դրամ ընդհանուր արժողությամբ վերանորոգման աշխատանքներ:

Գտնում եմ, որ Ընկերությունը թույլ է տվել պայմանագրով նախատեսված պարտավորության խախտում, որը հանգեցրել է պատվիրատուի կողմից պայմանագրի միակողմանի լուծմանը, ուստի գտնում եմ, որ առկա են Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու հիմքերը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

## Ո Ր Ո Շ Ե Ց Ի

Հայաստանի Հանրապետության ֆինանսների նախարարության 14.10.2019թ. թիվ 26/26-1/16849-2019 գրությամբ «Յդկադ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը բավարարել և «Յդկադ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների հետ կապված բողոքներ քննող անձի որոշումն ուժի մեջ մտնելու օրվանից հաշված երկու տարի ժամկետով:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է որոշումը պատվիրատուին, լիազորված մարմին ու բողոքարկման ընթացակարգում ներգրավված կողմերին ուղարկելուն հաջորդող օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված  
բողոքներ քննող անձ՝**



**ԳՐԻԳՈՐ ՆԵՐՍԻՍՅԱՆ**